

Obrigada Señor Reitor, membru administasaun UNTL nian, parseirus, kolegas, belun hotu....boatarde no benvindu ba ita hotu.

Ami haksolok tebes ita-bo'ot sira bele hamutuk ho ami ohin loron iha okaziaun memorável ida ne'e.

Ha'u aproveita momentu ida ne'e atu hato'o benvindu ba Majór Jenerál Forsas Armadas Estados Unidos nian Suzanne Vares-Lum husi Komando Indo-Pasífiku iha Hawaii. Nia hamutuk ho ita ohin iha eventu ne'e. Nia ho nia ekipa-sira semana ne'e mai iha Dili hodi partisipa iha ami nia Diálogu Bilaterál ba Defeza entre Estados Unidos no Timor – Leste. Nia hanesan ofisiál militar Estados Unidos ne'ebe maka vizita Timor – Leste hafoin dezde tinan rihun rua sanulu resin rua (2012).

Ohin, loron ne'ebe importante ba Uma Amerika no ba ita hotu. Ita hotu iha ne'e la'os de'it atu selebra aniversáriu Uma Amerika nian ba daruak, maibé mós atu komemora Uma ne'ebe hetan rekoñesimentu ofisiál hanesan *American Corner* ida, hola parte iha *American Spaces* besik atus hitu (700) iha mundu tomak.

Ami agradese kompromisu husi Reitor ho nia ekipa, no hakarak apresia servisu maka'as no koordenasaun entre Embaixada no UNTL durante tinan rua nia laran. Ami orgulhu tebes ho ita-boot sira-nia susesu sira too agora.

Espasu ne'e sei kontinua fornese informasaun kona-ba edukasaun iha Amérika no oportunidade-sira ba bolsa estudu. Fatin ne'e sei ajuda organiza programas kulturál no informasaun sira kona-ba Estados Unidos; no apoia estudu no ensinu lian Inglés; serbisu hamutuk ho antigu-alunus husi programa interkámbiu. No sei fornese espasu livre ba peskiza akadémiku, diskusaun, no debate kombina ho asesu livre ba baze-dadus estensivu iha biblioteka-eletróniku.

Ami iha planu boot sira ba futuro. Ami sei apoia muda no haluan Uma Amerika. Ami espera atu lori wifi velocidade lais hodi ajuda estabeselese UmaAmerika hanesan nasaun ne'e nia sentru prinsipál ba debate, dezeńu, inovasaun, peskiza.

Buat sira ne'e hotu depende ba ita-boot sira-nia apoiu, ita-boot sira-nia parseria, no ita-boot sira-nia servisu hamutuk. Ha'u enkoraja hotu-hotu atu aproveita vantajen husi saida maka Uma Amerika iha atu oferese.

Ami konvida imi hotu atu mai aprende lian Inglés iha ne'e ka konversa ho especialista-sira kona-ba tópiku oin-oin husi mundu tomak. Ka liu mai iha ne'e hodi haree filme iha tempu kalan ka jogu mejudia nian?

Sente livre hodi kontaktu ho pesoál UmaAmerika nian hodi haree oinsá sir abele ajuda ita-boot sira no koalia ho Zeck, Diretór UmaAmerika nian, kona-ba ideas ruma ne'ebé imi iha atu halo ami-nia relasaun ho Timor-Leste sai forte liu tan.

Estadus Unidus mós iha programa no iniciativa barak ba foin-sae sira iha Timor-Leste. Ami-nia programa foun liu maka Iniciativa Lideransa Foin-sae Sudeste Aziátika nian ka YSEALI. YSEALI nu'udar rede programa ida hodi liga futuru lideransa-sira ASEAN nian ho Estadus Unidus.

YSEALI oferese oportunidade hodi mellora imi-nia kapasidades profisionál, abilidade iha lian Inglés, no fó ba imi oportunidade atu partisipa iha bolsa-estudu ba dezvoltimentu no akadémiku.

Atu hatene barak liu tan kona-ba YSEALI, favór vizita Embaixada nia pájina internet ka koalia ho Roselia.

Obrigada dala ida tan ba ita-boot sira-nia amizade no apoiu. “Uma” iha lian Inglés signifika “House”. Iha Amérika ami iha espresaun ida – Ami-nia Uma hanesan Imi-nia Uma. Entaun, iha ne'e iha Uma Amerika ne'e - Ami-nia UMA – Imi-NIA UMA! Obrigada